

**LJEKARSKA/LIJEČNIČKA KOMORA
FEDERACIJE BOSNE I HERCEGOVINE**

**PRAVILNIK
O ZAJEDNIČKIM KRITERIJIMA I POSTUPCIMA STRUČNOG USAVRŠAVANJA
LJEKARA/LIJEČNIKA U FBiH**

Sarajevo, 15.11. 2025. godine

Na osnovu člana 221. stav 6. alineja 4. Zakona o zdravstvenoj zaštiti (Službene novine FBiH broj 46/10, 75/13), člana 8. Statuta Ljekarske/Liječničke komore FBiH, Skupština Ljekarske/Liječničke komore FBiH na sjednici održanoj dana 26. aprila 2014. godine donijela je, a dana 22. aprila 2017. godine, 27. 04. 2019. godine usvojila izmjene i dopune Pravilnika, te jena sjednici održanoj dana 02.12.2023. godine usvojila Pravilnika o izmjenama i dopunama Pravilnika o zajedničkim kriterijima i postupcima stručnog usavršavanja ljekara/liječnika u FBiH, čiji prečišćeni tekst sada sadrži: tekst Pravilnika o zajedničkim kriterijima i postupcima stručnog usavršavanja ljekara/liječnika u FBiH (br.01-97/14 od 26.04.2014. godine, br. 01-46/17 od 22.04.2017. godine i br. 01-51/19 od 27.04.2019. godine) i tekst Pravilnika o izmjenama i dopunama Pravilnika o zajedničkim kriterijima i postupcima stručnog usavršavanja ljekara/liječnika u FBiH br.01-216/23 od 02.12.2023. godine, te prečišćeni tekst sada glasi

PRAVILNIK O ZAJEDNIČKIM KRITERIJIMA I POSTUPCIMA STRUČNOG USAVRŠAVANJA LJEKARA/LIJEČNIKA U FBIH

I OPĆE ODREDBE

Član 1.

Ovim Pravilnikom utvrđuju se principi, sadržaj, organizacija, oblici i rokovi stručnog usavršavanja te postupak provjere stručnosti koju ljekar/liječnik ostvari tokom stručnog usavršavanja i koji na području Federacije Bosne i Hercegovine provode kantonalne/županijske ljekarske/liječničke komore.

II PRINCIPI STRUČNOG USAVRŠAVANJA

Član 2.

Principi stručnog usavršavanja ljekara/liječnika su:

- dostupnost programa stručnog usavršavanja svim doktorima medicine,
- jedinstvenost medicinske doktrine, što podrazumjeva da medicinska saznanja moraju biti svojina svih ljekara/liječnika,
- naučnu osnovanost i savremenost, što podrazumjeva da trajna nastava mora biti naučno osnovana i da prenosi nova svjetska i vlastita dostignuća radi osposobljavanja ljekara/liječnika prema svjetskim standardima,
- slobodan izbor u nastavi, što podrazumjeva da svaki ljekar/liječnik ima pravo izabrati sadržaj i oblik nastave koji mu odgovara s tim da ukupno prikupljeni bodovi za obnavljanje odobrenja za samostalan rad ne mogu biti isključivo iz jednog oblika usavršavanja.

III SADRŽAJ STRUČNOG USAVRŠAVANJA LJEKARA/LIJEČNIKA

Član 3.

Ljekari/liječnici imaju i obavezu na kontinuirano i trajno stručno usavršavanje radi održavanja i unapređenja kvaliteta zdravstvene zaštite.

Kontinuirano i trajno stručno usavršavanje iz stava 1. ovog člana obavlja se putem različitih oblika stručnog usavršavanja, sa ciljem osiguranja i poboljšanja sigurnosti i kvaliteta zdravstvenih usluga koje ljekari/liječnici pružaju u okviru svog stručnog naziva.

Kontinuirano i trajno stručno usavršavanje ljekara/liječnika predstavlja uslov za dobijanje licence za rad ljekara/liječnika.

Član 4.

Ljekar/liječnik se stručno usavršava kroz učešće na kongresima, simpozijima i drugim oblicima stručnih sastanaka, učešće na tečajevima za stručno usavršavanje, rješavanjem testova u pisanom ili elektronskom obliku, studijskim boravcima u zemlji ili inostranstvu, objavljivanjem radova u naučnim ili stručnim časopisima i knjigama.

Ljekar/liječnik se stručno usavršava i sticanjem stručnog naziva primarijus, sticanjem statusa specijalista, odnosno subspecijalista, sticanjem naučnog zvanja magistar ili doktor nauka, mentorstvom.

Član 5.

Postupak stručnog usavršavanja ljekara/liječnika provodi se po planu kontinuiranog usavršavanja ljekara/liječnika kojeg donose zdravstvene ustanove.

Stručno usavršavanje ljekara/liječnika planira se i provodi i u organizaciji kantonalnih/županijskih ljekarskih/liječničkih komora.

Postupak donošenja plana, organizacije i provođenja kontinuiranog usavršavanja iz stava 2. ovog člana provodi se na način utvrđen ovim Pravilnikom te Statutom i drugim aktima kantonalnih/županijskih ljekarskih/liječničkih komora.

Član 6.

Izvršni odbor Ljekarske/Liječničke komore FBiH, na prijedlog Komisije za koordinaciju edukacije, donosi plan kontinuiranog usavršavanja ljekara, članova Ljekarske/Liječničke komore FBiH, koji nisu članovi kantonalnih/županijskih ljekarskih/liječničkih komora.

Član 7.

Svaki organizovani i prijavljeni oblik kontinuirane medicinske edukacije kantonalne/županijske ljekarske/liječničke komore vrednuju, u skladu sa ovim Pravilnikom, određenim brojem bodova, a ljekari/liječnici su dužni sakupljati bodove.

III ORGANIZACIJA KONTINUIRANE EDUKACIJE

Član 8.

Postupak organizacije i provođenja kontinuiranog usavršavanja provodi se na način utvrđen ovim Pravilnikom te Statutom i drugim aktima kantonalnih/županijskih ljekarskih/liječničkih komora.

Član 9.

Izvođenje kontinuirane edukacije, kantonalne/županijske ljekarske/liječničke komore, organizuju samostalno ili u saradnji sa zdravstvenim ustanovama, stručnim društvima, udruženjima, medicinskim fakultetima, ministarstvom, zavodima i drugim fizičkim ili pravnim licima.

Član 10.

Organizator stručnog skupa mora, najkasnije trideset (30) dana prije održavanja stručnog skupa, kantonalnoj/županijskoj ljekarskoj/liječničkoj komori prijaviti namjeru održavanja stručnog skupa.

U prijavi stručnog skupa organizator mora taksativno navesti podatke o stručnom skupu kako bi kantonalna/županijska ljekarska/liječnička komora mogla donijeti odluku o kategorizaciji skupa i vrednovanju skupa, odnosno dodjeli bodova za aktivne i pasivne učesnike skupa.

Odluka o kategorizaciji stručnog skupa i broju bodova za aktivne i pasivne učesnike dostavlja se organizatoru u pisanom obliku.

Član 11.

Kantonalne/županijske ljekarske/liječničke komore će organizatoru skupa, u zavisnosti od oblika organizovanja stručnog skupa, izdati verifikacioni list za potvrdu prisustva ljekara/liječnika stručnom skupu te evidentirati bodove u registru ljekara/liječnika za aktivne i pasivne učesnike stručnog skupa.

Kantonalne/županijske ljekarske/liječničke komore mogu organizatoru stručnog skupa ili ljekaru/liječniku lično izdati i certifikate o učešću na skupu, a organizator je dužan prije ili nakon održavanja skupa, stručnoj službi ljekarske komore dostaviti popis učesnika stručnog skupa, u pisanom ili elektronskom obliku.

Kantonalne/županijske ljekarske/liječničke komore i organizator će zaključiti ugovor kojim se uređuju međusobna prava i obaveze u postupku kontinuirane edukacije u skladu sa ovim Pravilnikom te Statutom i drugim aktima kantonalne/županijske ljekarske/liječničke komore.

Član 12.

Certifikat koji izdaje kantonalna/županijska ljekarska/liječnička komora je potvrda o učešću na stručnom skupu, bodovanom od strane komore, a koju ljekar/liječnik koristi kao dokaz o sakupljenim bodovima u postupku obnove licence.

Certifikat izdat od strane kantonalne/županijske ljekarske/liječničke komore sadrži slijedeće podatke: naziv, sjedište i znak ljekarske komore / organizatora stručnog skupa, mjesto i datum održavanja skupa, naziv skupa,

broj bodova za aktivne i pasivne učesnike, ime i prezime ljekara/liječnika kojem je izdat certifikat, pečat i potpis predsjednika ljekarske komore / organizatora stručnog skupa.
Organizator kategoriziranog i vrednovanog stručnog skupa je dužan učesnicima stručnog skupa dostaviti certifikate.

IV OBLICI STRUČNOG USAVRŠAVANJA

1. Kongres

Član 13.

Kongres je skup koji obrađuje neki specifični medicinski problem ili više problema koji se prepliću i za koje postoji zajednički interes učesnika.

Kongres sadrži naučno – istraživačka ili stručna predavanja, kao uvod u temu koja će se dalje obrađivati na predavanjima, radionicama, okruglim stolovima, poster sekcijama, raspravama i drugim oblicima rada. Kongres može biti domaći i međunarodni.

Međunarodni kongres može organizovati strano ili domaće stručno ili naučno društvo, ili neka druga institucija.

Međunarodni kongres koju organizuje domaće stručno ili naučno društvo, mora imati najmanje tri (3) predavača iz inostranstva.

Pasivno učešće na kongresu dokazuje se certifikatom o prisustvu, a aktivno i kopijom objavljenog rada ili sažetka iz zbornika radova kongresa.

Učešće na kongresu boduje se u skladu sa ovim Pravilnikom.

2. Simpozij

Član 14.

Simpozij je naučno – stručni sastanak koji se bavi užom temom iz medicine i zdravstva.

Simpozij mora imati uvodno predavanje stručnjaka za temu, usmene prikaze, radionice ili poster prezentacije, uz mogućnost rasprave.

Simpozij može biti domaći, domaći s međunarodnim učešćem i međunarodni.

Domaći simpozij ima samo domaće učesnike.

Domaći simpozij s međunarodnim učešćem ima i najmanje tri predavača iz inostranstva.

Međunarodni simpozij može organizovati međunarodno, ali i domaće stručno ili naučno društvo, kao i druge institucije. Međunarodni simpozij mora imati najmanje tri (3) predavača iz inostranstva.

Učešće na simpoziju dokazuje se certifikatom o učešću i poster prezentacijom.

Simpozij može trajati jedan dan, odnosno dva i više te se shodno tome vrši bodovanje simpozija.

3. Stručni sastanci

Član 15.

Prisustvo stručnim sastancima, koji su kategorizovani i vrednovani od strane kantonalne/županijske ljekarske/liječničke komore dokazuje se verifikacijom učesnika putem obrazaca izdatih od strane Kantonalne/županijske ljekarske/liječničke komore organizatoru skupa.

Prisustvo stručnim sastancima organizovanim od strane zdravstvene ustanove dokazuje se potvrdom izdatom i potpisanom od strane direktora zdravstvene ustanove, odnosno klinike ili druge odgovorne osobe u zdravstvenoj ustanovi, odnosno obrascima za verifikaciju učesnika izdatim od strane zdravstvene ustanove.

Potvrde iz stava 1. i 2. ovog člana moraju sadržati naziv stručnog sastanka, temu o kojoj se raspravljalo na stručnom sastanku, mjesto i datum održavanja sastanka te ime i prezime ljekara/liječnika koji je prisustvovao stručnom sastanku.

Učešće na stručnom sastanku boduje se u skladu sa ovim Pravilnikom.

4. Tečajevi kontinuirane edukacije

Član 16.

Tečajevi kontinuirane edukacije predstavljaju organizovanu nastavu iz užeg područja neke medicinske oblasti. Tečajevi mogu biti domaći i međunarodni, a prema vrijednosti se mogu podijeliti u tri kategorije (I/II/III).

DOMAĆI TEČAJEVI

Na tečaju I kategorije obrađuje se i prezentira na savremeni način neki aktuelni medicinski problem s najnovijim podacima iz svjetske literature, a predavači moraju biti priznati stručnjaci iz obrađivanog područja. Pojedino predavanje ne može trajati kraće od 15 minuta.

Tečaj I kategorije mora imati pisani materijal za kojeg se preporučuje da bude in extenso.

Ukupno trajanje tečaja I kategorije ne smije biti kraće od 20 školskih sati (1 sat = 45 minuta).

Tečaj I kategorije mora završiti odgovarajućim ispitom (rješavanje testa s najmanje 30 pitanja na koja mora biti najmanje 20 ispravnih odgovora ili polaganje usmenog ispita).

Na tečaju II kategorije određena tema mora biti obrađena i prezentovana na savremen način s najnovijim podacima iz svjetske literature, a predavači moraju biti stručnjaci određenog područja koje se obrađuje na tečaju.

Pojedino predavanje ne može trajati kraće od 15 minuta.

Tečaj II kategorije mora imati pisani materijal za kojeg se preporuča da bude in extenso.

Ispit nije obavezan.

Ukupno trajanje tečaja II kategorije ne smije biti kraće od 10 školskih sati (1 sat = 45 minuta).

Na tečaju III kategorije određena tema mora biti obrađena i prezentovana na savremen način s najnovijim podacima iz svjetske literature, a predavači moraju biti stručnjaci određenog područja koje se obrađuje na tečaju.

Pojedino predavanje ne može trajati kraće od 15 minuta.

Tečaj III kategorije ne mora imati pisani materijal niti ispit.

Ukupno trajanje tečaja III kategorije ne smije biti kraće od 6 školskih sati (1 sat = 45 minuta).

MEĐUNARODNI TEČAJEVI

Na međunarodnom tečaju I kategorije određena tema mora biti obrađena i prezentovana na savremeni način s najnovijim podacima iz svjetske literature, a predavači moraju biti stručnjaci određenog područja koje se obrađuje na tečaju.

Međunarodni tečaj I kategorije mora imati najmanje tri (3) predavača iz inostranstva.

Pojedino predavanje ne može trajati kraće od 15 minuta.

Međunarodni tečaj I kategorije mora imati pisani materijal, po mogućnosti in extenso.

Međunarodni tečaj I kategorije mora imati pismeni ili usmeni ispit, ili mogućnost rješavanja konkretnog problema.

Ukupno trajanje međunarodnog tečaja I kategorije ne smije biti kraće od 20 školskih sati (1 sat = 45 minuta).

Na međunarodnom tečaju II kategorije tema mora biti obrađena i prezentovana na savremeni način s najnovijim podacima iz svjetske literature, a predavači moraju biti stručnjaci određenog područja koje se obrađuje na tečaju.

Međunarodni tečaj II kategorije mora imati najmanje dva (2) predavača iz inostranstva.

Pojedino predavanje ne može trajati kraće od 15 minuta.

Međunarodni tečaj II kategorije mora imati pisani materijal, po mogućnosti in extenso.

Međunarodni tečaj II kategorije ne mora imati ispit.

Ukupno trajanje međunarodnog tečaja II kategorije ne smije biti kraće od 10 školskih sati (1 sat = 45 minuta).

Na međunarodnom tečaju III kategorije tema mora biti obrađena i prezentovana na savremeni način s najnovijim podacima iz svjetske literature, a predavači moraju biti stručnjaci određenog područja koje se obrađuje na tečaju.

Međunarodni tečaj III kategorije mora imati najmanje jednog predavača iz inostranstva.

Pojedino predavanje ne može trajati kraće od 15 minuta.

Međunarodni tečaj III kategorije ne mora imati pisani materijal.

Međunarodni tečaj III kategorije ne mora imati ispit.

Ukupno trajanje međunarodni tečaja III kategorije ne smije biti kraće od 6 školskih sati (1 sat = 45 minuta).

5. Studijski boravci u zemlji i inostranstvu

Član 17.

Studijski boravci podrazumijevaju boravak sa mentorom od najmanje dvije sedmice na klinikama u zemlji i inostranstvu.

Program studijskog boravka podrazumijeva usvajanje praktičnih iskustava u svrhu medicinske naobrazbe.

6. Testovi u elektronskom obliku (e-learning)

Član 18.

Pod testom u elektronskoj formi podrazumijeva se svaki test koji ima prethodno odobrenje od kantonalne/županijske ljekarske/liječničke komore i koji je objavljen na internet stranicama licenciranih organizatora testiranja koji za takvo testiranje imaju odobrenje.

Test mora sadržati najmanje deset (10), a najviše sto (100) pitanja.

Test može biti ocijenjen pozitivno ukoliko kandidat ispravno odgovori na najmanje 60 % pitanja.

Kantonalne/županijske ljekarske/liječničke komore i organizator testa zaključuju ugovor kojim se uređuju međusobna prava i obaveze, u skladu sa ovim Pravilnikom te Statutom i drugim aktima kantonalnih/županijskih ljekarskih/liječničkih komora.

V ROKOVI STRUČNOG USAVRŠAVANJA

Član 19.

Ljekar/liječnik je obavezan svakih šest (6) godina, u skladu sa Pravilnikom o utvrđivanju zajedničkih kriterija za licenciranje članova Ljekarske/Liječničke komore FBiH i članova kantonalnih/županijskih ljekarskih/liječničkih komora, obnoviti licencu.

Kantonalna/županijska ljekarska/liječnička komora obnovit će licencu ukoliko je u proteklom periodu od šest (6) godina, u postupku kontinuirane medicinske edukacije, ljekar/liječnik stekao **minimalno 120 bodova**.

Član 20.

Izuzetno, ukoliko je ljekar/liječnik iz opravdanih razloga (*privremena spriječenost za rad duža od šest mjeseci, trudnoća i komplikacije u vezi sa trudnoćom, porodijsko odsustvo i odsustvo radi njege djeteta, odnosno člana uže porodice i drugi opravdani slučajevi*) bio spriječen da učestvuje u postupku kontinuirane edukacije čime nije ostvario uslove utvrđene članom 20. ovog Pravilnika, rok za ispunjenje uslova za obnavljanje licence produžiti će se.

Nadležna ljekarska komora će ljekaru/liječniku iz stava 1. ovog člana produžiti period važenja licence za period jednak trajanju navedenih razloga.

U slučajevima iz stava 1. i 2. ovog člana, ljekar/liječnik je dužan kantonalnoj/županijskoj ljekarskoj/liječničkoj komori podnijeti dokaze kojim dokazuje postojanje okolnosti koje su prouzročile nemogućnost učešća u postupku kontinuirane medicinske edukacije.

VI PROVJERA STRUČNOSTI

Član 21.

Provjera stručnosti ljekara/liječnika, u svrhu obnavljanja licence, provodi se vrednovanjem stručnog usavršavanja kroz sistem bodovanja, u skladu sa ovim Pravilnikom.

Član 22.

Sistem bodovanja, za provjeru stručnosti ljekara/liječnika, određen je prema načinu stručnog usavršavanja i vrednuje se prema slijedećoj Bodovnoj listi:

BODOVNA LISTA

RB	Aktivnost	Bodovi
1.	Kongres II Kategorije- učesnik	5
2.	Kongres II Kategorije – predavač	10
3.	Kongres I Kategorije - učesnik	7
4.	Kongres I Kategorije – predavač	15
5.	Stručni sastanak/simpozij II Kategorije - učesnik	3
6.	Stručni sastanak/simpozij II Kategorije - predavač	7
7.	Stručni sastanak /simpozij I Kategorije - učesnik	5
8.	Stručni sastanak /simpozij I Kategorije - predavač	10
9.	Pozvani predavač na sastancima/simpozijima/kongresima	20
10.	Poster prezentacije – prvi autor	7
11.	Poster prezentacije – ostali autori	2
12.	Tečaj – učesnik (I / II / III kategorija)	35/25/15
13.	Tečaj – predavač (I / II / III kategorija)	40/30/20
14.	Studijski boravci sa mentorom - do 1 mjesec/preko 1 mjesec	30/60
15.	Stručni sastanak/predavanje unutar odjela (klinike, bolnice i domova zdravlja) odnosno službe (zdravstvene ustanove) - učesnik	1
16.	Stručni sastanak/predavanje unutar klinike odnosno na nivou zdravstvene ustanove - predavač	2
17.	Stručni sastanak/predavanje na nivou 2 ili više klinika, odnosno 2 ili više zdravstvenih ustanova - učesnik	3
18.	Stručni sastanak/predavanje unutar odjela (klinike, bolnice i domova zdravlja) odnosno službe (zdravstvene ustanove) - predavač	2
19.	Stručni sastanak/predavanje unutar klinike odnosno na nivou zdravstvene ustanove - predavač	4
20.	Stručni sastanak/predavanje na nivou 2 ili više klinika odnosno 2 ili više zdravstvenih ustanova - predavač	5
21.	Stručni sastanak u kojoj je primarni organizator farmaceutska kompanija – predavač – KOMERCIJALNI STRUČNI SASTANCI	4
22.	Stručni sastanak u kojoj je primarni organizator farmaceutska kompanija – učesnik KOMERCIJALNI STRUČNI SASTANCI	2
23.	Stručno predavanje na nivou Kantonalne/Županijske Ljekarske komore- predavač	15
24.	Stručno predavanje na nivou Kantonalne/Županijske Ljekarske komore -Učesnik	10
25.	Naučni članak u časopisu indeksiranom na Current Contents-u – prvi autor	50
26.	Naučni članak u časopisu indeksiranom na Current Contents-u – drugi autor ostali autori	25, ostali 10
27.	Naučni članak u časopisu indeksiranom na Current Contents-u – recenzent	30

28.	Naučni članak u inozemnom časopisu indeksiranom na PubMed-u – prviautor	35
29.	Naučni članak u inozemnom časopisu indeksiranom na PubMed-u – ostali autori	drugi autor 10, ostali 5
30.	Naučni članak u časopisu indeksiranom na PubMed-u –recenzent	15
31.	Naučni ili stručni članak objavljen u časopisu koji se citira u ostalim indeksiranim bibliografskim bazama-prvi autor	20
32.	Naučni ili stručni članak objavljen u časopisu koji se citira u ostalim indeksiranim bibliografskim bazama-ostali autori	10
33.	Naučni ili stručni članak objavljen u časopisu koji se citira u ostalim indeksiranim bibliografskim bazama-recenzent	12
34.	Neindeksirani časopisi-prvi autor	10
35.	Neindeksirani časopisi-ostali autori	5
36.	Univerzitetski udžbenik sa CIP-om univerzitetske biblioteke autor/ostali autori	80/60
37.	Urednik univerzitetskog udžbenika sa CIP-om univerzitetske biblioteke	60
38.	Poglavlje u univerzitetskom udžbeniku sa CIP-om univerzitetske biblioteke	20
39.	Recenzent univerzitetskog udžbenika sa CIP-om univerzitetske biblioteke	10
40.	Magisterij na medicinskom fakultetufakultetima	60
41.	Doktorat na medicinskom fakultetu	90
42.	Mentorstvo u magisteriju na medicinskom fakultetu	40
43.	Mentorstvo na doktoratu na medicinskom fakultetu	40
44.	Članstvo u komisiji za odbranu magisterija/disertacije	5
45.	Specijalizacija	90
46.	Subspecijalizacija	60
47.	Mentorstvo/komentorstvo u specijalizantskom stažu	20
48.	Mentorstvo/komentorstvo u subspecijalizantskom stažu	20
49.	Članstvo u komisiji za specijalistički ispit	10
50.	Članstvo u komisiji za subspecijalistički ispit	10
51.	PAT – program dodatne edukacije za porodičnu medicinu	30
52.	Primarijat	40
53.	E-learning/Webinar/CME Kurs	1-3
54.	E-learning/Webinar/CME Kurs + test	5
55.	Kontinuirana medicinska edukacija u jedinici Hitne medicinske pomoći - predavač	12
56.	Kontinuirana medicinska edukacija u jedinici Hitne medicinske pomoći - učesnik	10

Član 23.

Ukoliko ljekar/liječnik nije učestvovao u postupku kontinuirane edukacije te nije ostvario uslove utvrđene članom 20. ovog Pravilnika, kantonalne/županijske ljekarske/liječničke komore će izdati licencu samo uz prethodnu provjeru stručne osposobljenosti.

Provjera stručne osposobljenosti ljekara/liječnika iz stava 1. ovog člana obavlja se pred Komisijom kantonalne/županijske ljekarske/liječničke komore u koju se obavezno kooptiraju kao članovi:

- 1) Ljekari/liječnici stručnjaci iz oblasti iz koje se ispit polaže, iste ili veće stručne osposobljenosti u odnosu na kandidata.

Ljekaru/liječniku iz stava 1. ovog člana koji je zadovoljio u postupku provjere stručne osposobljenosti, licenca se izdaje s danom položenog ispita radi provjere stručne osposobljenosti.

VII PRELAZNE I ZAVRŠNE ODREDBE

Član 24.

Kantonalne/županijske ljekarske/liječničke komore su dužne, u roku od 90 dana od dana stupanja na snagu ovog Pravilnika, uskladiti svoje opće akte sa odredbama ovog Pravilnika te osigurati svojim članovima postupke propisane ovim Pravilnikom.

Zadužuju se sve kantonalne/županijske ljekarske/liječničke komore da obavijeste članstvo o promjeni broja bodova potrebnih za relicenciranje. Primjena broja bodova za relicenciranje počinje od 01.01.2027. godine.

Član 25.

Ovaj Pravilnik stupa na snagu osmog (8) dana od dana usvajanja na Skupštini Ljekarske/Liječničke komore FBiH.

Ovaj Pravilnik je objavljen na web stranici Ljekarske/Liječničke komore FBiH www.fmcbih.ba

Zenica, 26.04. 2014. godine
Broj: 01-97 /14

Predsjednik Skupštine
Mr. sc. Hidajet Rahimić, dr. med. prim.

Član 26.

Izmjene i dopune Pravilnika o zajedničkim kriterijima i postupcima stručnog usavršavanja ljekara/liječnika u FBiH usvojene na Skupštini dana 22.04.2017. godine i 27.04.2019. godine stupaju na snagu danom donošenja od kada će se i primjenjivati.

Prečišćen tekst Pravilnika o zajedničkim kriterijima i postupcima stručnog usavršavanja ljekara/liječnika u FBiH objavljen je na web stranici Komore www.fmcbih.ba.

Zenica, 22.04.2017. godine,
Br: 01-46/17

Predsjednik Skupštine
Mr. sc. Hidajet Rahimić, dr. med. prim

Zenica, 27.04.2019. godine,
Br: 01-51/19

Član 27.

Skupština Ljekarske/Liječničke komore F BiH je na sjednici održanoj dana 15.11.2025. godine, donijela Odluku o izmjenama i dopunama Pravilnika o zajedničkim kriterijima i postupcima stručnog usavršavanja ljekara/liječnika u FBiH br. 01-122/25 koja stupa na snagu osmog dana od dana objavljivanja na web stranici Ljekarske/Liječničke komore FBiH www.fmcbih.ba

Sarajevo, 15.11. 2025. godine
Broj: 01-126/25

Zamjenik predsjednik Skupštine
dr. Damir Baždarević

